



partii naleraq

Nuuk 10. oktober 2018  
UKA2018/192  
Pele Broberg Partii Naleraq

**Uunga siunnersuut: Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaata allanngortinneqarnissaa pillugu Inatsisartut inatsisaat nr. xx, xx. xxx 2018-imeersoq. (Piffissaq ungasinnerusoq eqqarsaatigalugu aningaasaliissuteqarnissamut Aningaasaateqarfimmut isertitassanut tunngavissat annertusineqarnerat, innersuussutip naqqiissuteqarfigineqarnera, pisortat ataatsimoorussamik IT atorlugu aaqqissuussinerat aamma missingersuutit oqimaaqatigiinnerat pillugu §§ 2-5-imik atorunnaarsitsigallartarnej)**  
(Aningaasaqarnermut Naalakkersuisoq)

### **Siullermeernera**

Partii Naleqqamit Inatsisartut Inatsisaannut allannguummik siunnersuut imatut naatsumik oqaaseqarfiginiarparput.

Allannguutissanut siunnersuutit teknikkiunerugaluartut imaannaanngitsunik imaqarput.

Imm. 2-5 tunngasut, tassa Imm. 50, mianersuutassaapput atorunnaarsinneqarnerat. Partii Naleqqamit erseqqarissaarutigissavarput allaffissornikkut inatsisit tulluutinngitsut naleqqussarsinnaanerat imminnerminik ajunngitsoq. Inuiaqatigiilli aningaasaataat aqunneranni missingersuutit oqimaaqatigiittussaanerata atorunnaarsinnissaa nalilersorluagassaavoq akuerineqarsinnaanersoq.

Ippassaq tusarparput Naalakkersuisut siunnersuuteqarsimasut, aningaasatigut kingunissaat qulaajarsimanagit. Missingersuutit oqimaaqatigiinnerannut piumasaqaat maanna atorunnaassappat, Partii Naleqqamit ernumanartoqartipparput. Sualummik una inatsit aamma kommunit aningaasatigut aqutsiniarnerannut tunngaviummat, kommunillu imaannaanngitsumik unaminartumillu inisseqqaneranni patajaallisaataasussaagaluarluni.

Mittarfissuarnut pilersaarutit ullumikkut oqaluuserisassatut inisseqqanngikkaluartut, siunnersuummi ersarissumik allaqqavoq inatsisit sanaartornernut annerusunut nutaanut akornuseequsaannginnerat. Imatut paasinarsinnaavoq maanna Inatsisartut Inatsisaanni aalajangersakkanik atorunnaarsitsisariaqalersugut, mittarfissuit sananeqarsinnaanngorlugit. Partii Naleqqamit inuiaqatigiit aningaasaateqarnikkut patajaattumik aqunneqarnissaat suliassat ataasiakkaaniit pingaernerutituassavarput.

Imm. 18-imut tunngasut aamma Partii Naleqqamit isumaqarpugut Partiit tamarmik isummernerat pingaaruteqartoq. Ullumikkut aningaasat nuutassat, ukiup tulliani aatsaat nuuttarneranni

iluortortaqarami. Tuaviisaarluni suliniarneq Inuiaqatigiit aningaasaataat atorlugit mianernartoqarami.

Imm. 32, styk 3 ukioq manna maaniinnaq qinersisoqarmat, atorfissaqarneranik takutitsivoq.

Imm. 46a Partii Naleqqamit qulakkeeqquvarput ullumikkut pisortat aqutsineranni, inuiaqatigiinnut aammalu minnerunngitsumik namminersortunut aporfiaaqataanissaa. Ilumullu inuiaqatigiit pitsaanerusumik akikinnerusumillu sullinnerannik kinguneqassasoq.

Maanna Sermersooq IT-mut tunngasunik sippuillutik atuisimanerannut nutaarsiassaniippoq, Inatsisillu naammannersut imaluunniit aqutsilluarnissaq qiviarneqartariaqarpoq. Inatsisit allanngorlugit aqutsilluarneq qulakkeersinnaavaa?

Partii Naleraq sinnerlugu taamatut naggasiillunga, Aningaasaqarnermut Akilerartarnermullu Ataatsimiititaliamut sukumiisumik suliareqqitassanngorlugu innersuupparput.